

22  
PROGRAMMA

Quo

Gloriosissimam

CHRISTI TRI-  
UMPHATORIS  
RESURRECTIONEM

RECTOR

UNIVERSITATIS ROSTOCHIENSIS

JOANNES JACO-  
BUS DOBELIUS,

Med.D.P.P.Poliater,& Facultatis

suæ p. t. DECANUS,

CIVIBUS ACADEMICIS,

devotâ animi veneratione,

seriò seduloq; colendam proponit.

---

ROSTOCHII,

Typis JOHANNIS KILII, Universitatis Typogr. 1669.





**ΗΕΡΟΦ** 'Ο ΧΡΙΣΤΟΣ,  
**SURREXIT** CHRISTUS; pri-  
 ma hodie vox Angeli est, mulie-  
 res, querulē Servatorē quērētes,  
 solantis. **ΗΕΡΟΦ** 'Ο ΧΡΙ-  
**ΣΤΟΣ, SURREXIT** CHRI-  
 STUS; prima hodie vox Chri-  
 stiani est, fratrem apud Græcos  
 salutantis, & **ΟΝΤΩΣ Η-**  
**ΕΡΟΦ, VERE SURREXIT**, prima vox est re-  
 salutantis. David, quando, cæsis Philistinorum tur-  
 mis, de hostibus triumpharet, filix Sionis cantilantes,  
 insigni plausu reducebant Victorem. Victore nostro  
 ex mortuis reviviscente, universa meritò Ecclesia læ-  
 tum aliquod **RESURREXIT** inclamat. **MAURITIUS**,  
 Belgarū Dux, ex durissimo, adversum Hispanos prælio,  
 acie diruptâ, biduum desideratus, biduum pro mor-  
 tuo habebatur: Sed, quanto defensoris erat gau-  
 dio, postquam re ipsâ esse verum sentiebant, quod de-  
 fensoris de se nomen præbebat, **MARS VIVIT**. Vivit,  
 qui pro nobis, mortis reis, mortuus erat; nec ipse tan-  
 tum



58700 (22)



tum vivit, sed & morte suâ mortem vicit. Introierat  
in mundum per peccatum mors, cum hâc pugnandum  
nobis erat; sed peccaveramus omnes, unde omnes  
juebamur mori. Rejeceramus à nobis Deū condito-  
rē nostrū: fas erat, uti adversario nostro Diabolo subji-  
ceremur. Misert<sup>9</sup> nostri Filius DEI descendebat de cœ-  
lis, sed & ipse, vitæ Dux, à morte nos redempturus, du-  
cebatur ad mortem. Ablata olim erat in horto vita,  
& jam sepeliebatur in horto: ohe! nunc omnis simul  
nostra spes erat sepulta! utq; nunquam eadem resusci-  
taretur, lapide sepulchrum obsignabatur. Sed pro-  
priâ hodiè virtute vita revixit, resurrexit gloriose: par  
est, uti restituta sibi, in sui locum reponat mortem.  
Athleta interdū, cū adversariū se prostravisse putat,  
tū demū lethalem accipit plagam: vicisse mors  
omnes hactenus nos videbatur, jam victa ipsa jacet  
atq; sepulta. Qui cibum accipiunt, quem retinere  
non possunt, etiam, quem ante comederant, propter  
illum revomunt: Acceperat mors, quod corrup-  
pere corpus non poterat, rejicere ergo tenetur omnia  
corporis istius membra, hactenus prehensa. *Ubi nunc  
est stimulus tuus mors? absorpta est mors in victoriam.*  
*DEO sit gratia, qui NOBIS dat victoriam, per Domi-  
num nostrum JESUM CHRISTUM! Nunc pridem  
mortui ex tumbis resurgunt: æternâ premendi servi-  
tute, in libertatem afferuntur: vinculis perpetuis*  
*strin-*



stringendi, exsolvuntur: patriæ restituuntur, qui eam  
perdiderant: omnes nos vivimus hâc unâ morte, peri-  
turi omnes sine hâc morte. Neq; sufficit vicisse mor-  
tem, Diabolus quoq; erat debellandus, & iis ipsis qui  
dem, quibus ipse orbem debellaverat, armis. Pecca-  
tum est, quô cælo hominem avulserat: Peccatū est quod  
restituit hominē cœlo. Decerpserat, instinctu Satanæ  
homo de arbore cognitionis vetitâ, & præcipitabatur  
in infernum: sed jam roserat Satanas arborem sibi veti-  
tam, in quâ omnes scientiæ thesauri latent, & restituere  
cogitur, quos inique à Deo seduxerat, ipse hodie ca-  
ptivus tenebrarum catenis ducendus. *Quis jam inten-  
tabit crimina adversus electos DEI? DEUS est, qui ju-  
stificat: quis ille, qui condemnet? CHRISTUS est, qui  
mortuus est, imò qui & resurrexit, qui morti venenum  
est, inferno pestis.* Dixerat Caiphas: expedit nobis, ut  
unus moriatur pro populo, & non tota Gens pereat:  
& in hoc quidē non falsus erat, sed impius vates. Periisset  
non unus tantum Israël's populus, sed hominum gens  
universa. Sed verò, condemnabas justū Caipha, uti in-  
terficeretur, non respiciens hominū salutem, quin po-  
tius injustissimè veritatē opprimebas, salutē perdebas,  
vitam extinguebas, Deum affligebas, Messia occidebas.  
Partibus ejus singulis singulare tormentum confere-  
bas, caput vepribus perforabas, capillos vellebas, faci-  
em sputis colaphisq; defœdabas, oculos spectaculis



mœstissimis cruciabas, aures probris saturabas, nares  
foetoribus afficiebas, corpus funibus extensum, flagris  
concidebas, manus pedesq; transfodiebas, lin-  
guam aceto, felle, ac siti vexabas, neq; ulla corporis  
pars dolorū videretur vacua, ipsū deniq; cor lāce tere-  
brabas: ast quid omne hoc conamin Caipha? resurre-  
xit perdēd' ille gloriose, tu miserē peris. Perfidissimi ju-  
dæorū, perseverantiā Servatoris, in speciem non levi  
argumento, tentantes, *si Rex Israël est*, inquiunt, *descen-  
dat nunc de cruce, & credimus ei. Alios salvos fecit, sei-  
psum saluum faciat, si est CHRISTUS, electus DEI.*  
Sed, quòd esset electus DEI, non descendit de cruce,  
qui venerat, uti crucem sustineret. Longè glo-  
riosius est, lapide ad monumentum apposito, mor-  
tuum resurrexisse, quàm de cruce descendisse vivum.  
Veruntamen, ne usquam locorū malitia cesset, glorifis-  
simam illam, & , quā salutaris nihil conferri nobis  
poterat, Domini nostri Resurrectionem, haud pauci  
obfuscare conantur. Milites ad sepulchrum ejus ac-  
cubantes, **NON RESURREXIT**, clamant; sed est  
ablatus. Ecce offam argenteam Pontificum! quā,  
quicquid corrupti habebant apud se corruptissimi, in  
eum evomere jubentur, qui non poterat corrumpi.  
Ablatus est, inquiunt scelestissimi, & à discipulis quidem  
suis ablati. Itane verò, qui triduo ante vivum  
deserebant, tanto cum periculo mortuum reperent?  
Eamne



Eamne nunc induere fortitudinem miseri, quorum  
fortissimus ad ancillæ voculam exanimatus concidebat?  
Res ista altius paulò venit examinanda. Si discipuli  
illud saxo clausum cadaver sunt furati, cur nemo ve-  
strum, ô milites, restitit? quare omnes hoc concestis?  
immò *dormiebamus*, respondent, qui ad vigilandum e-  
rant constituti. Sit ita: si dormivistis, excubitores vi-  
gilantissimi, quomodo fures istos clancularios vidistis?  
nisi forte apertis dormitaveritis oculis, prout lepores  
solent. Mendacem oportet esse memorem: somnia-  
stis fortè, unde somnia venditis: somniis, quid esse  
mendacius solet? Illud verò, scitote, spurcissima ve-  
stra in gloriosissimam hanc Domini nostri Resurrectio-  
nem mendacia valitura, quod adversus solem  
nebulæ valent. Æterne Sol, CHRISTE Triumphator!  
per hanc commentorum nubem, potentiam tuam  
magis asseruisti: non effulsisset sic veritas Resurrectio-  
nis Tuæ, nisi mēdaciorū eam sic caligo pressisset! Mi-  
rum tamen hic est, quod & Discipuli Servatoris Resurre-  
ctionem negare non vereantur. Thomas ex-  
presse, *nisi videro*, inquit, *in manibus ejus vestigium cla-  
vorum, & mittam digitum meum in vestigium clavorum,*  
*& mittam manum meam in latus ejus, non credam.* Ast  
veniā dignos hosce judicas, mitissime JESU, quòd  
non perfidiæ pernicies ipsos habeat, sed incredulitatis  
tantum crassities premat. Cerne manus, Thoma, trans-  
fixas,



fixas, cerne latus transfossam, corpus universum,  
contracta, & videbis sentiesq; ipse, quod credere ha-  
ctenus detrectasti. De iis quid dicendum erit, qui  
non corpus tantum CHRISTI tangunt, sed & sub-  
indè comedendū, & sanguinem ejus bibendū sumunt,  
& tamen Resurrectionem ejus malitiosissimè negant?  
Illud enim adeò hodiè frequens est, ut quoquò ani-  
mum, aures, oculos flectas; minimos, medioximos,  
maximos, **NON RESURREXISSE CHRISTUM**,  
debauchantes deprehendas. Scilicet, si caput nostrum  
crederent surrexisse, & ipsi ad Resurrectionem aliquā-  
do adspirarent. Sed impossibile est, sic vivere posse,  
quemadmodum passim vivitur, & aliam vitam expe-  
ctare. *Non resurgemus, inquit Apostolus, ad vitam, si  
non commorimur, non conglorificabimur, si non compati-  
mur, non coregnabimus, si non simul sustinemus.* Quid  
enim? CHRISTUS in doloribus, nos in delitiis vive-  
mus? Illius erunt sputa, spinæ, flagra; nostrum erunt,  
non dicam mensæ, risus, joci, voluptates, gaudia, ho-  
nores; sed injustitiæ, iniquitates, odia, simultates, frau-  
des, latrocinia, bella, cædes? Quamdiu tam fatuis  
consiliis insistemus? Humiliavit semetipsum **CHRIS-  
TUS**; nos extollimur, & quicquid humanitatem sa-  
pit, detestamur. Vanissimi sumus, si promissa affectamus  
præmia, & quicquid præmittendū est officii, detrecta-  
mus. Certus & indubius sermo est, quemadmodū **CHRIS-  
TUS**



**STUS** resurrexit à mortuis, per gloriam Patris, ita & nobis in novitate vitæ esse ambulandum. *Vetus etenim homo noster simul crucifixus est, ut destruat corpus peccati, ut ultra non serviamus peccato.* Præclarum, prorsus est, notatuq; maximè dignum, quod de Josiâ Regum Fasti produnt. Præcepit, inquit Sacer Historicus, Josias omni populo, facite Pascha Domino DEO vestro, nec enim factum est Pascha tale à diebus judicum, & omnium dierum Regum Israël, & Regum Juda, sicut in octavo decimo anno factum est Pascha, istud Domino in Jerusalem. Sed & Pythones, & harios, & figuras idolorum, & immunditias, & abominaciones, quæ fuerant in terrâ Juda & Jerusalem, abstulit Josias, ut statueret verba legis. Hoc idem est, quod epulari Apostolus vocitat, non in fermento veteri, neque in fermento malitiæ aut nequitiae, sed in azymis sinceritatis & veritatis. AMANTISSIMI MEI, sat diu fermenti acorem impatientia nostra, fastus, pigritia, & invidia pani nostro incoxerunt; nunc azymos patientiæ, humanitatis, piæ solertiæ, spiritualis lætitiæ, divinæ charitatis comedamus. Expergiscere, quisquis dormis, & surge à mortuis, & sic demum, qui **SURREXIT** hodie, **CHRISTUS** tibi illucescet!

**P.P. sub Sigillo Rectoris.**

*d. XI. April. M. DC. LXIX.*

